

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 51. stav 1. tačka a) Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu pravnog lica "G-Petrol" d.o.o., Sarajevo, broj NB0100000/IZ-ZA/75/2022 od 12. oktobra 2022. godine, na sjednici Državne regulatorne komisije za električnu energiju, održanoj 2. novembra 2022. godine, donijeta je

ODLUKA

O SUSPENZIJI LICENCE ZA OBAVLJANJE DJELATNOSTI MEĐUNARODNE TRGOVINE ELEKTRIČNOM ENERGIJOM

1. Suspendira se licenca za obavljanje djelatnosti međunarodne trgovine električnom energijom, izdata pravnom licu "G-Petrol" d.o.o., Sarajevo, na zahtjev vlasnika licence.
2. Licenca iz tačke 1. ove Odluke suspendira se počev od 3. novembra 2022. do 31. augusta 2023. godine.
3. Ova Odluka stupa na snagu danom donošenja, a njen dispozitiv bit će objavljen u "Službenom glasniku BiH" i službenim glasilima entiteta.

Obrazloženje

Pravno lice "G-Petrol" d.o.o., Sarajevo (u daljnjem tekstu: podnosilac zahtjeva), dostavilo je 14. oktobra 2022. godine Državnoj regulatornoj komisiji za električnu energiju zahtjev za suspenziju licence za obavljanje djelatnosti međunarodne trgovine električnom energijom koji je zaveden pod brojem 05-28-12-267-1/22, do kraja perioda na koji je navedena licenca izdata, odnosno do 31. augusta 2023. godine.

Naime, podnosiocu zahtjeva je 29. augusta 2018. godine izdata licenca za obavljanje djelatnosti međunarodne trgovine električnom energijom, registracijskog broja 05-28-12-286-16/18, na period od 1. septembra 2018. godine do 31. augusta 2023. godine.

Nesporno je pravo podnosioca zahtjeva kao vlasnika licence da, u smislu člana 57. Pravilnika o licencama – Prečišćeni tekst ("Službeni glasnik BiH", broj 63/16), zatraži suspenziju iste, uz ispunjenje obaveze uplate ranije propisane naknade za rješavanje zahtjeva za suspenziju.

Sloboda je izbora vlasnika licence da u skladu sa svojim poslovnim interesima disponira pravom da određeno vrijeme ili trajno prestane obavljati djelatnost međunarodne trgovine električnom energijom, da namjeru korištenja tog prava prethodno prijavi regulatoru i da o tome pribavi regulatornim pravilima propisanu odluku.

Imajući u vidu navedeno, odlučeno je kao u dispozitivu ove Odluke.

U skladu sa članom 9.2 Zakona o prijenosu, regulatoru i operatoru sistema električne energije u BiH, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-267-2/22
2. novembra 2022. godine
Tuzla

Predsjedavajući Komisije
Suad Zeljković